

## U FOKUSU

### Peter Sørensen novi šef Delegacije EU u BiH

*Peter Sørensen donosi u ovaj posao jedinstveno iskustvo o BiH i široj balkanskoj regiji, rekla je Catherine Ashton*

Po završetku konkursa za mjesto šefa Delegacije EU u Bosni i Hercegovini, visoka predstavnica EU/ potpredsjednica Evropske komisije Catherine Ashton sa zadovoljstvom je objavila namjeru da Petera Sørensen premjesti sa njegove trenutne pozicije šefa Delegacije u EU u Bivšoj Jugoslavenskoj Republici Makedoniji na dužnost šefa Delegacije Evropske unije u Bosni i Hercegovini. Ova vijest je objavljena u vrijeme koje je od presudne važnosti za regiju Zapadnog Balkana i posebno za Bosnu i Hercegovinu.

„Peter Sørensen donosi u ovaj posao jedinstveno iskustvo o Bosni i Hercegovini i široj

balkanskoj regiji“, rekla je Catherine Ashton. „Mislim da niko nije bolje kvalifikovan da preuzme ovu osnaženu ulogu šefa Delegacije.“

#### Kratka biografija:

Peter Sørensen ima preko 15 godina iskustva u regiji Zapadnog Balkana. Njegovi prethodni angažmani uključuju pozicije: lični predstavnik visokog predstavnika EU u Beogradu (2006-2010); zamjenik šefa „Stuba IV“ (rekonstrukcija i ekonomski razvoj) Privremene administrativne misije Ujedinjenih nacija na Kosovu (UNMIK) (2002-2006); viši savjetnik specijalnog predstavnika generalnog sekretara UN-a na Kosovu (2001-2002), pravni savjetnik specijalnog



Peter Sørensen

izašlanika generalnog sekretara UN-a za Balkan (2000); šef političkog odjela i viši savjetnik šefa OSCE-a u Hrvatskoj (1997-1999); pravni savjetnik visokog



predstavnika u Sarajevu (1996-1997), i politički savjetnik i posmatrač u Posmatračkoj misiji Evropske zajednice u bivšoj Jugoslaviji (1995-1996).



#### BiH u bojama EU

Povodom 9.maja, Dana Evrope, Delegacija EU u BiH i Direkcija za evropske integracije BiH organizovali su brojne sportske i kulturne manifestacije.

● 5. strana




## U OVOM BROJU



Fotoreportaža  
**Podrška Evropske unije  
Parku prirode T.A.J.A.N**

● 2. strana



Intervju sa Bakirom Dautbašićem:  
**Lijep je osjećaj kada u pregovorima  
sa EU imate spremne odgovore na  
sva pitanja**

● 3. strana



Ekonomija  
**EU podržava mala i srednja bh.  
preduzeća**

● 7. strana

## Podrška Evropske unije Parku prirode T.A.J.A.N

Evropska unija je obezbijedila 350.000 eura putem Instrumenta za prepristupnu pomoć (IPA), za razvoj Parka prirode T.A.J.A.N. kao atraktivne turističke destinacije.

T.A.J.A.N. (Tourism, Adventure, Joy, Attractions, Nature) jedini je park prirode te vrste u centralnoj BiH.

Promociji ovog projekta su prisustvovali brojni inostrani i domaći zvaničnici, kao i veliki broj građana, prvenstveno ljubitelja prirode. Upriličena je biciklistička utrka na području Parka prirode Mitrovići, kod Zavidovića. Program se sastojao od promotivno-rekreativne trke u dužini od 23 kilometra i glavne XC (cross country) trke u samom parku, gdje je svaki od pet krugova dugačak 3,5 kilometara. U „cross

country“ trci učestvovalo je pedeset takmičara iz cijele Bosne i Hercegovine, a među njima su bili i predstavnici međunarodnih organizacija i ambasada u BiH.

U narednih 30 mjeseci T.A.J.A.N. će razviti ključnu turističku infrastrukturu, „mountain bike“ i penjačke staze biće opremljene sa GPS navigacijom, izgrađiće se osmatračnice za posmatranje divljači, urediti i otvoriti za posjetitelje špilje Srednja stijena i Lukina pećina, otvoriti turistički info centar u Kamenici koji će se baviti iznajmljivanjem planinarske opreme, te osigurati smještajni kapaciteti za boravak i ishranu turista u lokalnom vikend naselju.

Uz obuku pripadnika Gorskog službe spasavanja i nabavku planinarske i druge opreme, posebna pažnja posvetiće se



*Turizam, avantura, radost, atrakcije i priroda*

međunarodnoj promociji ovog projekta. Planirano je i učešće na sajmovima turizma

u inostranstvu, organizacija sportskih i drugih manifestacija, te štampanje višejezičnih promotivnih materijala i brošura.



*Poboljšanje imidža turističke destinacije*



*Odlično druženje na promociji Projekta*



*Biciklistička utrka na području Parka prirode Mitrovići kod Zavidovića*

## Lijep je osjećaj kada u pregovorima sa EU imate spremne odgovore na sva pitanja

Prije sastanka monitoring timova za provođenje odluke o ukidanju viznog režima za građane BiH, postojala je strepnja od ponovnog uvođenja viza. Ali to je nakon sastanka 11. maja u Briselu otklonjeno, a zvaničnici Evropske komisije su poručili da su više nego zadovoljni poštivanjem odluke i ispunjavanjem uslova u BiH.

- Ja sam istinski zadovoljan sastankom u Briselu i zaista je lijep osjećaj kada dođete u situaciju da na sva postavljena pitanja imate odgovore i to odgovore koji su prihvatljivi za drugu stranu, odnosno predstavnike Evropske komisije. To je u svim dosadašnjim pregovorima delegacija BiH sa EU rijedak, a možda i jedini takav slučaj.

**U** kontekstu ranijih najava zvaničnika iz Brisela da bi vize ponovo mogle biti uvedene za neke zemlje u regionu, da li ove izjave zvaničnika Evropske komisije smatrate potvrdom da bezvizni režim za državljane BiH nije ugrožen?

Brojka od 180 bh. građana koji su podnijeli zahtjeve za azil nije zabrinjavajuća. Tako, glasine o ponovnom uvođenju viza bh. građanima definitivno nisu realne. Nažalost, naše kolege u Srbiji i Bivšoj Jugoslovenskoj Republici Makedoniji imaju probleme sa različnim azilantima; nadamo

se da će biti u stanju da riješe ove probleme.

Ipak institucije u BiH trebaju uraditi još neke stvari. Šta je konkretno poručeno iz Brisela?

- Iz Evropske komisije su imali i neke preporuke, kao što je implementacija antikorupcijskog zakona. Ukazano je da je potrebno što prije usvojiti Pravilnik o unutrašnjoj kontroli Agencije za prevenciju korupcije i koordinaciju borbe protiv korupcije i da se odmah krene u zapošljavanje potrebnog osoblja kako bi Agencija postala funkcionalna. Tu su i izmjene pravilnika o Graničnoj policiji BiH, u koje treba ugraditi neke novine koje se odnose na funkcioniranje Centra za analizu rizika. Također, treba nastaviti ispunjavati obaveze vezane za ljudska prava, i tu prije svega treba ubrzati uspostavu Ureda ombudsmena, provedbu Strategije za Rome i implementaciju Zakona o zabrani diskriminacije.

Posebno je skrenuta pažnja da u uvoj godini treba staviti u funkciju server za razmjenu policijskih podataka, tako da kantonalni MUP-ovi treba što hitnije da unesu potrebne podatke u bazu, jer sve ostale policijske agencije su taj posao već okončale.

Očekujete li zapreke i da li su institucije spremne ispuniti te uslove imajući u vidu da još nije formirana



Bakir Dautbašić

vlast na državnom nivou?

- Sa naše tačke gledišta to nisu veliki problemi, jer to su odluke koje treba donijeti Vijeće ministara BiH, koje se, srećom, redovno sastaje. Treba imati u vidu i da je Vijeće ministara pod predsjedavanjem Nikole Špirića i njegovog zamjenika Sadika Ahmetovića uvijek bilo posvećeno rješavanju pitanja koja se tiču vizne liberalizacije. I vjerujem da će se tako i nastaviti.

Brojni evropski zvaničnici pa i visoka predstavica EU za vanjske poslove i sigurnost Catherine Ashton je istakla da ispunjavanje uslova za viznu liberalizaciju može biti uzor za rješavanje drugih obaveza na evropskom putu. Kako Vi gledate na to?

- Ja mogu govoriti o sigurnosnom sektoru. A sigurnosni sektor je pohvaljen i na ovom sastanku i naglašeno je da je samo u ovom sektoru zabilježen napredak. To je zvanični Brisel prepoznao i oni ne kriju da smo uradili dobar posao.

**D**ali se odluka ministara EU o izmjenama šengenskih propisa može odraziti na putovanja građana BiH?

- To jeste trenutno veliki unutrašnji problem Evropske unije i oko toga je stvorena jedna dosta neugodna atmosfera. To je i potvrda koliko je pitanje migracije važno za Evropsku uniju. Utoliko je isto važno da mi nastavimo borbu protiv ilegalnih migracija na način kako smo to do sada radili.

BiH postala uzor zemljama u našem regionu

## Građani BiH najdisciplinovaniji u poštovanju uslova bezviznog režima

Vlasti Bosne i Hercegovine su na primjeru ispunjavanja uslova iz Mape puta za liberalizaciju viznog režima i dosljednoj provedbi odluke o ukidanju viza za bh. građane pokazale Briselu da

mogu jednoglasno, efikasno i promptno djelovati te biti uzor među zemljama našeg regiona.

Upravo na to je ukazala i visoka predstavica EU za vanjsku politiku i sigurnost

Catherine Ashton tokom nedavne posjete Sarajevu. Ona je dodala kako bi pristup liberalizaciji viza trebao poslužiti kao model djelovanja za druge institucije u BiH u procesu evropskih integracija.





Trkom u Evropu

## BiH u bojama Evropske unije

Obilježavanje Dana Evrope ove godine proteklo je u ozračju brojnih sportskih i kulturnih manifestacija širom Bosne i Hercegovine. Sve manifestacije organizirali su Delegacija Evropske unije u BiH i Direkcija za evropske integracije BiH.

Turnir u sjedećoj odbojci 4.

maja u Mokrom, opština Pale, obilježio je početak putovanja „EU karavana“ i „EU na točkovima“. Ova predstava na točkovima je uključila promociju časopisa EU Palčić tokom kojeg se više od 400 djece okupilo ispred zgrade Parlamenta BiH i učestvovalo u raznim kreativnim radionicama.

Oko 400 amaterskih atletičara iz Bosne i Hercegovine i regiona je 8. maja učestvovalo u događaju „Trka u Evropu“. Trci od 4 kilometra kroz centar Sarajeva pridružili su se i vršilac dužnosti šefa Delegacije EU u BiH, Renzo Davidi i šef Odjela operacija Boris Iarochevitch.

Usljedio je još proslava – u Banjoj Luci 9. maja, Doboju 10. maja i Gradišci 12. maja. Djeca i mladi su učestvovali u kreativnim radionicama, kvizovima, folklornim izvedbama i izložbama koje su im pružile priliku da nauče više o Evropskoj uniji i napretku u procesu evropskih integracija. Mladim ljudima je također



Evropska sedmica počela je 4. i trajala do 14. maja



EU karavan je tokom 13 dana posjetio 20 gradova

ponuđena mogućnost da kažu šta misle o izgledima BiH u procesu evropskih integracija.

Okrugli sto u Doboju 10. maja okupio je predstavnike lokalnih vlasti i NVO sektora, koji su učestvovali u diskusiji o ulozi lokalnih vlasti u procesu evropskih integracija. Učesnici su istakli neophodnost poboljšanja pristupa informacijama o različitim EU fondovima a koji su dostupni zajednicama i projektima u Bosni i Hercegovini, kao i mehanizmima za njihovo korištenje. Učesnici su bili u prilici čuti kako unaprijediti pisanje projektnih prijedloga i upravljanje projektima na lokalnom nivou, naročito u saradnji sa NVO sektorom.

Koncert dvije popularne rok grupe „Letu štuke“ i „Skroz“ 14. maja u sarajevskom Domu mladih bio je finale proslave Dana Evrope u Bosni i Hercegovini na kojem se okupilo više od 3000 mladih.

Tokom dvije sedmice, EU predstave na točkovima posjećeno je 20 gradova. U proslavama su se pridružili predstavnici lokanih vlasti i nevladine organizacije, te su na taj način poslali zajedničku poruku podrške naporima Bosne i Hercegovine u procesu integracije u EU.

Pored navedenih gradova, predstava na točkovima posjetila je Konjic, Mrkonjić grad, Ključ, Kladanj, Rogaticu, Istočno Sarajevo, Teslić, Brod, Prnjavor, Zvornik, Stolac, Travnik, Bugojno, Srebrenicu i Višegrad.

Tokom ovih posjeta djeca su učestvovala u EU tematskim kvizovima dobili ruksake pune korisnih materijala i informacija o EU i poklona.

Općenito govoreći, građani koji su učestvovali u proslavi Dana Evrope naveli su da su najviše zainteresovani za obrazovanje u Evropi i uključivanje na EU tržište rada.



*Renzo Daviddi i Boris Iarochevitch dočekuju goste na prijemu u Delegaciji EU u BiH*



*Brojne zvaničnice u Delegaciji EU u BiH*



*Rock koncert u Domu mladih u Sarajevu*



*Učenje o Evropskoj uniji*



*Djeca su učestvovala u EU kvizovima*

## Füle: Korak po korak

Poruka Stefana Fülea, Komesara za proširenje Evrope i evropsku susjedsku politiku u povodu Dana Evrope.

„Poruka Shumanove deklaracije u kojoj se

prepoznaje da ‘Evropa neće nastati odjednom’ već kroz postepena, konkretna postignuća, posebno je relevantna za proces proširenja za koje smo izgradili tokom

posljednjih 60 godina. Samo korak po korak, kroz postepenu i opipljivu saradnju ćemo riješiti sukobe, izgraditi trajan mir, zaštititi prava ljudi i postići prosperitet za sve. Drago mi

je što je Bosna i Hercegovina dio ovog procesa. Posvećen sam potpuno odlučnom nastavku rada sa Bosnom i Hercegovinom u ostvarivanju vizije Roberta Schumana“.



## Metalska industrija nudi šansu za oporavak bh. ekonomije

**Projekat EUMETAL fokusiran je na uvođenje novih tehnologija i stručnosti, implementaciju EU standarda i jačanje izvoznih sposobnosti**

Sarajevska regionalna razvojna agencija (SERDA) ponudila je konkretnu pomoć preduzećima metalske industrije u okviru projekta pokrenutog uz pomoć Evropske unije krajem prošle godine. Projekat EUMETAL podržava konkurentnosti malih i srednjih preduzeća uvođenjem modernih tehnologija, uvođenjem EU standarda i marketingom njihovih proizvoda za potrebe izvoza. Budžet ovog projekta je 458 hiljada eura, od čega EU finansira 85 posto, a preostali dio je osigurala SERDA.

U januaru su dužnosnici SERDE posjetili više od 60 firmi koje se bave proizvodnjom i preradom metala i metalških proizvoda, proizvodnjom mašina i uređaja, te autoindustrijom sa područja sarajevske regije. Regija obuhvata 32 općine iz oba entiteta.

„Cilj ove posjete bio je predstaviti projekat i identificirati potrebe i zahtjeve samih preduzeća, te uspostaviti

međusobnu saradnju u procesu implementacije projekta“, kazala je Aida Džamalija Duran, projekt-menadžer u SERDA-i. „Preduzeća su posebno iskazala interes za uvođenje EU standarda i CE znaka na pojedine proizvode, te istakla potrebu za dodatnim stručnim usavršavanjem radnika i to uglavnom zavarivača, CNC operatera, strugara, brusaa i bravara.“

Planirano je da se u deset preduzeća uvedu EU standardi tokom dvogodišnjeg projekta. Oni uključuju sistem upravljanja kvalitetom ISO 9001, sistem upravljanja zaštitom životne sredine ISO 14001 i zaštitu na radu OHSAS 18001. Uposlenici će moći da saznaju sve o važnosti i upotrebi „CE



Projekat EUMETAL podržava uvođenje modernih tehnologija

znaka“, kao i o načinu predavljanja na međunarodnom tržištu.

Za 20 firmi bit će sufinansirano učešće na međunarodnim sajmovima. Takođe, 200 nezaposlenih i 100 radnika u metalškom sektoru proći će obuku za deficitarna metalška zanimanja, a za 50 nezaposlenih radnika bit će omogućeno stažiranje u firmama metalške industrije.

## EU pomaže zaustavljanje zagađenja sliva rijeke Spreče

Sliv rijeke Spreče je jedan od najgušće naseljenih područja u Bosni i Hercegovini. Građani su se onedavno počeli organizovati i dizati glas protiv situacije koja je opasna za zdravlje i koja narušava ekonomski prosperitet i kvalitet života širom regije.

Inicijativa za pokretanje projekta za zaštitu sliva rijeke Spreče došla je od Centra za razvoj i podršku Tuzla (CRP), uz finansijsku podršku Delegacije Evropske unije

u BiH u okviru programa Evropski instrument za demokratiju i ljudska prava (EIDHR), te je okupila čak 30 nevladinih organizacija i udruženja i predstavnika svih općina koje se nalaze u ovom slivu. Trenutno stanje u slivu rijeke Spreče



Jezero Modrac: Kako riješiti problem zagađenosti

### EU zakonodavstvo

Strategija projekta je da se problem zagađenja Spreče uvrsti u Plan upravljanja slivom rijeke Save. Bosna i Hercegovina se već obavezala da će implementirati elemente projekta za zaštitu Save. Krajnji rezultat koji se želi postići je smanjenje onečišćenja do prihvatljivih vrijednosti koje su u skladu sa standardima EU i normama u okviru zakonodavstva BiH.

Iz CRP-a podsjećaju da je Bosna i Hercegovina preuzela službenu obavezu da smanji stepen zagađenja voda u okviru procesa pristupanja EU, kao i da je BiH potpisnica međunarodnih konvencija koje se odnose na smanjenje zagađenja i zaštitu voda.

„Posebno je to važno kad znamo da je sliv rijeke Spreče dio sliva rijeke Bosne, koja pripada slivu rijeke Save“, rekao je CRP projekt-menadžer Darko Tišma. „Savski sliv, pak, pripada slivu Dunava koji uključuje teritorije 19 evropskih zemalja“.

najbolje se može opisati kao kritično. Tuzlanski kanton je pretežno industrijsko područje i ono što je bilo prečištača vode instaliranih kod velikih proizvođača tokom nemilih događaja 90-ih godina su uništeni. Sada svi industrijski kompleksi uzimaju vodu sa jezera Modrac za proizvodnju, a vraćaju je zagađenu.

„Situacija na jezeru Modrac ne može biti gora“, kaže Drago Jakić, predstavnik Sportsko-ribolovne zajednice jezera Modrac.

## EU podržava mala i srednja bh. preduzeća

Očekuje se povećanje finansijske pomoći tokom naredne dvije godine za više od 200 preduzeća

Fabrika iz Visokog specijalizirana za namještaj i fabrika za izradu bojlera iz Jajca su samo dva od 39 bh. preduzeća koja trenutno profitiraju od projekta finansiranog od strane EU, a koji ima za cilj pomoć srednjim i malim preduzećima (SMP) da dobiju moderne tehnologije i certifikate kojima će biti povećana njihova konkurentnost i stvoreni uslovi za otvaranje novih radnih mjesta.

Secom d.o.o. je tipični porodični posao, osnovan u Visokom 1996. godine, koji sad upošljava 56 radnika. Preduzeće ima modernu opremu i postrojenja koja se neprekidno modernizuju i proširuju novim mašinama za proizvodnju veće kvalitete u proizvodnji lijepljenih ploča i namještaja. Skoro 99 posto proizvodnje je za izvoz. Glavno tržište je u Njemačkoj, Poljskoj i Mađarskoj.

Program usluga poslovnog konsaltinga (UPK), pokrenut od strane EBRD, a od 2010. godine finansiran od strane Delegacije EU, pomogao je Secomu da implementira sistem za kvalitet, zaštitu okoline i FSC projekat (ISO 9001, ISO 14001, FSC CoC). FSC certifikat je dodijeljen u septembru 2010. godine, a revizije certifikata za ISO 9001 i ISO 14001 su



Pogoni fabrike Secom d.o.o. u Visokom: Jačanje kvaliteta proizvodnje uz pomoć EU

provedene u februaru 2011. godine.

Program UPK podržavao je identifikovanje relevantnih direktiva i standarda EU koji se odnose na bojlere (četiri direktive EU i 10 standarda), tako da Termo Flux preduzeće može implementirati Projekt o sigurnosti proizvoda – CA marking, koji bi mu omogućio da zadovolji evropske norme i izvoz na evropsko tržište.

U 2010. godini program je pomogao 39 preduzeća, a nova finansijska pomoć prema IPA 2009 će omogućiti pomoć za najmanje 100 novih preduzeća tokom dvije naredne godine.

„Mi pomažemo malim i srednjim preduzećima u BiH

tako što finansijski podržavamo poslovno savjetovanje i konsultantske aktivnosti koje obavljaju kvalificirani domaći konsultanti. Pokušavamo da razvijemo i ojačamo vještine i kvalitet domaćih konsultanata tako što organizujemo obuke i seminare za izgradnju kapaciteta za konsultantske firme i širenje tržišne ekonomije zasnovane na najboljim iskustvima”, objasnio je program-direktor Zihinja Hasović.

Istakao je da je UPK model orijentisan ka tržištu. Preduzeća dobiju fleksibilan grant od 25 do 75 posto ukupnih troškova projekta, maksimalno do 10 000 eura, u zavisnosti od kriterija kao što su vrsta projekta, veličina preduzeća, lokacija itd.

## Okvir za investicije na Zapadnom Balkanu

Rezultati rada koje je u toku prve godine ostvarila inicijativa „Okvir za investicije na Zapadnom Balkanu (WBIF)“ prezentirani su u Delegaciji Evropske unije u BiH. U okviru programa, kako je pokazano, na teritoriji Zapadnog Balkana dodijeljen je 81 grant u ukupnoj vrijednosti od 139 miliona eura. Ova nepovratna finansijska sredstva

poslužila su kao stimulans međunarodnim finansijskim institucijama koje su odobrile investicije u vrijednosti od preko tri milijarde eura za izvedbu projekata čija ukupna cijena premašuje šest milijardi eura.

„Okvir za ulaganja na Zapadnom Balkanu predstavlja projekat koordinacije i saradnje između Evropske komisije i Razvojne banke Vijeća Evrope



Yngve Engström, šef Jedinice za regionalne programe, Generalnog direktorijata za proširenje EU

(CEB), Evropske banke za obnovu i razvoj (EBRD) i Evropske investicijske banke (EIB)”, kazao je Yngve

## VIJESTI

### Borba protiv korupcije



Dvodnevni seminar o jačanju borbe protiv korupcije koji organizuju FBiH Ministarstvo unutrašnjih poslova u saradnji sa Instrumentom za tehničku pomoć i razmjenu informacija Evropske unije (TAIEX) i Policijskom misijom EU u BiH (EUPM), održan je u u Sarajevu.

Domenico Paterna, zamjenik Šefa misije EUPM rekao je da je borba protiv korupcije prva i glavna dužnost države.

### Jačanje lokalne demokratije

Evropska unija je obezbijedila 1,5 miliona eura za provedbu druge faze projekta „Jačanje lokalne demokratije - LOD II“. Povodom toga je u Sarajevu potpisan Memorandum o razumijevanju između 15 partnerskih opština i Razvojnog programa Ujedinjenih naroda (UNDP).

„Općine igraju ključnu ulogu u procesu EU integracija jer su one nivo vlasti koji je najbliži građanima i sa kojim se najbolje može objasniti šta su to integracije i koji su uslovi postavljeni u tom procesu“, kazao je Boris Iarochevitch, šef Operacija Delegacije EU u BiH.

## Jedanaesta „Zelena sedmica“

**Evropska komisija je usvojila Vodič za transformaciju EU u konkurentniju ekonomiju sa niskom emisijom karbona do 2050. godine**

Jedanaesta „Zelena sedmica“ (Green Week), najveća godišnja konferencija o evropskoj politici o zaštiti okoline, održana je od 24. do 27. maja u Briselu i širom Evrope. Ovogodišnja

pružena jedinstvena šansa za debatu i razmjenu iskustava iz ove oblasti. U posljednjem desetljeću ova konferencija je postala ključni događaj za sve koji su uključeni u zaštitu životne sredine u Evropi.



tema konferencije je bila „Efikasnost resursa – koristi manje, živi bolje“.

Tokom „Zelene sedmice“ ukazano je na problem smanjenja i sve veće oskudice izvorima energije, te je

Na konferenciji su predstavljene strategije koje podstiču smanjenje upotrebe karbona i efektivnije iskorištavanje prirodnih resursa.

Naučna ispitivanja pokazuju da globalno zagrijavanje

treba biti smanjeno na manje od 2 stepena Celzijusa iznad temperature koja je bila u periodu prije industrijalizacije (oko 1,2 stepena Celzijusa iznad današnjeg nivoa) kako bi svijet imao šansu da spriječi velike klimatske promjene.

Bez preduzimanja odlučne globalne akcije za ograničenje klimatskih promjena, temperatura će se do 2050. godine povećati za 2 ili čak više stepeni Celzijusa. Kako bi ostali ispod 2 stepena, svaka zemlja će morati smanjiti ispuštanje štetnih stakleničkih gasova (GHGs – greenhouse gas emissions), a razvijene zemlje će morati prednjačiti u tome te do 2050. godine smanjiti za 85- 90 procenata nivo emisije iz 1990. godine.

Evropska komisija je usvojila Vodič za transformaciju EU u konkurentniju ekonomiju sa niskom emisijom karbona do 2050. godine. Inicijativa je preduzeta zbog toga što će vođstvo u tranziciji ekonomije u ekonomiju sa niskim stepenom ispuštanja karbona i efikasnom upotrebom resursa imati višestruke koristi za EU.

Zadržavanje vodeće pozicije u razvoju i implementaciji inovativnih tehnologija sa



niskom emisijom karbona će omogućiti Evropi da otvori nove izvore razvoja i sačuva sadašnja, te osigura nova radna mjesta. Gradeći ekonomiju sa niskim stepenom emisije karbona EU će, takođe, smanjiti osjetljivost na nagle skokove cijena goriva u budućnosti i druge probleme vezane za energetske sigurnost, kao i značajno srezati troškove uvoza energenata i smanjiti zagađenost zraka.

Osim sjednica i radionica koje su tokom „Zelene sedmice“ održane u Charlemagne zgradi u Briselu, na njoj su predstavljene prezentacije sa rješenjima za biznisne o pitanju zaštite okoliša, aktivnosti nevladinih organizacija, inicijative lokalnih i regionalnih vlasti, te evropska i međunarodna tijela širom Evrope.

### EU zvaničnici u posjeti BiH

### Rekli su:

#### Štefan Füle

„Ovo nije vrijeme za političke igre u Bosni i Hercegovini. Ovo je vrijeme kada političari trebaju postići dogovor utemeljen na evropskoj perspektivi.“



*Evropski komesar za proširenje i evropsku politiku susjedstva Štefan Füle*

#### Catherine Ashton

„Evropska unija je jasno potvrdila svoju opredjeljenost za evropsku perspektivu Bosne i Hercegovine. Spremi smo pomoći Bosni i Hercegovini da krene naprijed.“



*Visoka predstavnica Evropske unije za vanjske poslove i sigurnosnu politiku/potpredsjednica Evropske komisije Catherine Ashton*

#### Miroslav Lajčak

„Nije naše da odlučujemo koje stranke će činiti vlast, ali je važno da te stranke imaju snažnu potporu birača i Parlamenta BiH.“



Mi želimo da ta vlada predstavlja snagu koja će voditi zemlju ka reformama.“

*Izvršni direktor za Evropu i centralnu Aziju pri zajedničkoj Službi vanjskih poslova EU Miroslav Lajčak*

#### José Manuel Barroso

„BiH želi postati članicom EU. BiH jeste članica evropske porodice i ima evropsku budućnost. EU je spremna pomoći pojačanim prisustvom i politikama, kao i sa značajnom finansijskom pomoći.“



*Predsjednik Evropske komisije José Manuel Barroso*

Delegacija Evropske komisije u Bosni i Hercegovini, Skenderija 3a, 71 000 Sarajevo, Bosna i Hercegovina, Tel: +387 33 254 700

Internet strana Evropske unije: [www.europa.eu](http://www.europa.eu)

Aktivnosti Evropske unije u BiH: [http://ec.europa.eu/comm/enlargement/bosnia\\_herzegovina/index.html](http://ec.europa.eu/comm/enlargement/bosnia_herzegovina/index.html)

Delegacija Evropske komisije u BiH: [www.europa.ba](http://www.europa.ba)

Ako želite da primete ovu publikaciju, molimo vas da pošaljete e-mail sa vašim imenom i adresom na:

**DELEGATION-BIH@ec.europa.eu ili fax na: +387 33 666 037**